

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 242794 24 St
Zenica, 9.7.2024. godine

Općinski sud u Zenici, stečajni sudija Samra Spahić-Drino, u prethodnom postupku za utvrđivanje uvjeta za otvaranje stečajnog postupka nad stečajnim dužnikom Trgovinsko prometno društvo „TOP SPORT“ d.o.o. Kakanj, sa sjedištem na adresi Alije Izetbegovića br. K-15, Kakanj, kojeg zastupa Advokatsko društvo „Hadžimahmutović“ d.o.o. Zenica, koji je pokrenut po prijedlogu predlagača Trgovinsko prometno društvo „TOP SPORT“ d.o.o. Kakanj, sa sjedištem na adresi Alije Izetbegovića br. K-15, Kakanj, van ročišta, dana 9.7.2024. godine, donio je:

R J E Š E N J E

Pokreće se prethodni postupak radi utvrđivanja uvjeta za otvaranje stečajnog postupka nad imovinom stečajnog dužnika Trgovinsko prometno društvo „TOP SPORT“ d.o.o. Kakanj, sa sjedištem na adresi Alije Izetbegovića br. K-15, Kakanj, matični registarski broj subjekta upisa 43-01-0563-09 (stari broj 1-7391).

Za privremenog stečajnog upravnika imenuje se Begagić Jasmin iz Zenice, Školska broj 10.

Privremeni stečajni upravnik dužan je odmah po prijemu rješenja o imenovanju preduzete radnje utvrđene članom 63. Zakona o stečaju i to naročito:

- obezbijediti i brinuti se o imovini dužnika,
- izvršiti pregled dužnikovih poslovnih prostorija i izvršiti uvid u poslovne knjige i dokumentaciju dužnika,
- utvrditi da li postoji razlog i uslovi za otvaranje i vođenje stečajnog postupka,
- ispitati da li imovina stečajnog dužnika može pokriti troškove stečajnog postupka,
- utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka i
- izvršiti kontrolu poslovanja dužnika.

Privremeni stečajni upravnik dužan je podnijeti pismeni izvještaj ovom sudu u roku od 30 dana od imenovanja u kojem će izvijestiti sud o poduzetim radnjama i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje izgledi da se poslovanje stečajnog dužnika u cjelini ili u pojedinim dijelovima može nastaviti.

Privremeni stečajni upravnik je dužan dostaviti sudu poseban izvještaj vezano za okolnosti iz člana 61. stav 2 tačka b. Zakona o stečaju.

Mjere pojedinačnog prinudnog izvršenja pokrenute protiv stečajnog dužnika se obustavljaju, a izlučna i razlučna prava povjerioci ne mogu ostvariti u prethodnom postupku.

Povjerioci stečajnog dužnika se pozivaju da privremenom stečajnom upravniku bez odgađanja saopšte koje mjere obezbjeđenja buduće stečajne mase na predmetima imovine stečajnog dužnika oni zahtijevaju.

Privremeni stečajni upravnik dužan je da stečajnom sudiji položi račun i podnese izvještaj o svom radu za period privremene uprave.

Privremeni stečajni upravnik ima pravo na naknadu koja se određuje u skladu sa pravilnikom.

Rješenje će biti objavljeno na oglasnoj tabli suda, web stranici Općinskog suda u Zenici, na Internet stranici FIA-e i u Službenim novinama F BiH, te će se dostaviti Odjeljenju registra ovog suda, Zemljišno-knjižnom

uredu Općinskog suda u Kaknju i Službi za imovinsko-pravne, geodetske poslove i katastar Općine Kakanj, radi upisa zabilježbe pokretanja prethodnog postupka.

O b r a z l o ž e n j e

Predlagač kao dužnik putem punomoćnika podnio je 8.3.2024. godine ovom sudu prijedlog za otvaranje stečajnog postupka nad ovim privrednim društvom, iz razloga što duži vremenski period posluje negativno, nema uposlenih, te ukupna pasiva na dan 31.12.2023. godine iznosi 132.618,00 KM, pošto je posljednjih godina došlo do problema u poslovanju i ostvareni prihodi nisu dovoljni za pokrivanje rashoda, tako da je društvo počelo iskazivati nelikvidnost i pojavila se platežna nesposobnost.

Nakon što je utvrđeno da je prijedlog za pokretanje stečajnog postupka podnesen od strane ovlaštenog predlagača u smislu odredbe člana 58. stav 2. Zakona o stečaju („Službene novine F BiH“, broj: 53/21) i da je isti dopušten, naloženo je predlagaču da uplati novčana sredstva na ime predujma finansiranja troškova prethodnog postupka radi utvrđivanja uslova otvaranja stečajnog postupka, temeljem člana 60. Zakona o stečaju, a predlagač je u ostavljenom roku izvršio uplati sredstava potrebnih za finansiranje prethodnog postupka.

Na osnovu dokumentacije priložene uz prijedlog za otvaranje stečajnog postupka, predlagač je učinio vjerovatnom platežnu nesposobnost.

Sud je primjenom odredbe člana 61. Zakona o stečaju donio rješenje o pokretanju prethodnog postupka radi utvrđivanja uvjeta za otvaranje stečajnog postupka nad dužnikom i u tom pravcu imenovao privremenog stečajnog upravnika, sa liste stečajnih upravnika, te je istom naloženo da izvrši sve radnje navedene u izreci ovog rješenja, a sve u skladu sa članom 63. Zakona o stečaju.

Na osnovu iznesenog, a primjenom navedenih odredbi, odlučeno je kao u izreci rješenja.

PRAVNA POUKA:

Protiv ovog rješenja dozvoljena je žalba u roku od 8 dana od dana objavljivanja, Kantonalnom sudu u Zenici putem ovog suda. Žalbu mogu uložiti stečajni dužnik i privremeni stečajni upravnik.

Stečajni sudija

Samra Spahić-Drino